

SELEBRASAUN PENITENSIÁL kona-ba **ESPERANSA**



(Iha altár oin, bele tau sana-rai ida ka kopu eh bikan ida ne'ebé fera)

G: Ita halibur hamutuk iha ne'e, la'ós tanba ita buka Maromak nia perdaun, maibé tanba Maromak rasik buka ita atu perdua ita. Se mak Nia atu hadomi ita hanesan ne'e? Nia mak Maromak Moruk nian, Aliansa ne'ebé nia hakarak hafoun beibeik no Nia la kole atu hametin fila fali Aliansa ida ne'e, bainhira ita sobu nia. Durante selebrasaun ida ne'e Jezús Kristu, Maromak nia Esperansa, sei tulun ita atu halo dalan no sei hanorin mai ita atu bolu Maromak nu'udar Aman. Tan ne'e, ita hahú ita-nia selebrasaun **"Hodi Padre..."**

KANTU:.....

G: Na'i, dala ida tan ohin Ita haraik mai ami esperansa katak Ita sei perdua ami. Iha ami-nia moris, nakukun no naroman kahur malu no dala ruma, ami la hatene atu ba ne'ebé. Forma ami-nia fuan atu ami bele hatán ba Ita buat ne'ebé Ita hein, halo ami tuir Ita-nia Oan Jezús, atu Ita-nia Espíritu bele la'o hamutuk ho ami, lohin loron, aban bairua no ba nafatin. AMEN

L: Fil 3,8-14

GI: Paulo nia experiénsia bele hanorin buat barak mai ita: hanesan nia rasik hakerek, nia fó susar ba Kreda, ho laran toos no maka'as liu, maibé maromak nia grasa dada nia atu nakfilak an no, hodi simu grasa ida ne'e, Paulo hahú buka buat ida de'it: Jezús. Nakfilak an ida ne'e, la soi Paulo husi susar, terus oinoin, maibé, hodi hateke ba kruz, nia komprende katak depois de terus no mate, hamutuk ho Jezús Kristu, nia sei hetan naroman Moris hi'as nian. Fiar ida ne'e halo Paulo la'o ho esperansa hasoru ninia futuro. Oras ne'e, ita mós, ne'ebé foin liu husi experiénsia Semana santa no Paskua nian, sei reflète kona-ba esperansa ne'ebé Jezús Moris hi'as haraik mai ita.

KANTU: (Paskua no esperansa nian)

Confessio Laudis

Ha'u hanoin ba tempu Kuarezma ne'ebé foin liu no tempu Paskua nian ne'ebé sei hala'o daudaun. Maromak nia Futar Lia konvida beibeik ha'u atu tau laran metin ba Na'i. Ha'u agradece Maromak ba momentu sira ne'ebé, maski karik ha'u hetan difikuldade sira, ha'u hatene tau ha'u-nia konfiansa iha Maromak. No mós ha'u agradece Jezús Kristu ne'ebé manán ona ha'u-nia fuan no dudu ha'u atu ba oin ho esperansa. (ida-idak hanoin ba momentu sira iha ne'ebé nia moris ho esperansa)

Ita esprime ita-nia agradesimentu liuhusi knananuk ida:....

Confessio Vitae

Maibé, dala barak, ha'u la hatene moris iha esperansa, ha'u la hatene hateke ba futuro no ha'u hela de'it iha ha'u-nia terus laran. Ha'u hanoin lai:

- Karik ha'u haluha katak Jezús soi ona ha'u no buat hotu sai todan ba ha'u...?
- Karik ha'u la haree ema ne'ebé hakarak tulun ha'u no ha'u sente mesak de'it...?
- Karik ha'u la reza ona tanba ha'u hanoin katak Maromak la rona ha'u...?
- Karik iha susar laran ha'u hakiduk de'it....?

- Karik ha'u la hatene ona hato'o liafuan esperansa nian ba ema sira ne'ebé presiza...

Bainhira ha'u-nia moris nu'udar sarani la hatudu sinál ruma esperansa nian, bainhira ha'u "hanesan ema hotu", ha'u hanesan sana-rai (kopu ka...) ne'ebé fera tiha, la bele ona halo ninia servisu. Maromak prontu de'it atu halo ha'u-nia moris sai furak fali, maibé ha'u presiza husu ninia perdaun: ha'u sei husu perdaun kona-ba saida?

Confessio Fidei

G: Maski ita-nia frakeza ita hatene katak Jezús hakarak soi ita; tan ne'e ita repete hamutuk ho S. Paulo: "Ha'u considera buat hotu mesak buat aat, atu manán Jesus tanba, iha Nia, mak ha'u hetan ha'u an rasik".

- Ha'u bele halo saida atu la bele lakon esperansa iha situasaun susar?

G: Ho Jezús Moris hi'as nia Espíritu, molok simu perdaun, ita reza orasaun ne'ebé Jezús rasik hanorin: ita presiza malu atu bele la'o ba oin ho esperansa, tan ne'e, ita ka'er liman no foti sa'e hodi reza: *Ami Aman*

(durante tempu konfesa nian, bele reza salmu 39 (40) parte ruma ne'ebé tuir mai. Bainhira hotu-hotu konfesa ona bele hananu knanauk ida hodi tau sana rai ka kopu foun no hasa'e ida ne'ebé fera ona)

G: Na'i, oras ne'e ami simu ona Ita-nia perdaun: tulun ami atu kontinua moris ho ksolok no esperansa tempu Paskua nian: halo Rekonsiliasaun ida ne'e loke dalan domin nian ba ami no tulun ami atu fahe ho ami-nia maluk sira domin no perdaun ne'ebé ami simu husi Ita. Ami harohan ne'e...

Salmu 39 (40)

Ha'u tau ha'u neon tomak iha Ita Na'i:

Nia see tilun mai, rona ha'u lian.

Nia tau iha ha'u ibun knananuk foun ida, atu hahí hananu ha'u-nia Maromak.

Na'i Ita la hakarak sacrifísiu,
la hakarak mós buat karan;
Ita la husu buat karan no na'an maten,
maibé, Na'i, Ita loke de'it ha'u tilun.

Tan ne'e ha'u dehan: "Na'i ha'u mak ne'e, atu halo tuir Ita hakarak"!

Ne'e de'it ha'u hakarak, ha'u-nia Maromak; Ita-nia ukun iha ha'u laran tomak.

Ha'u haklaken Ita-nia justíça
iha povo tomak sira leet;
Na'i, Ita hatene loloos
katak Ha'u la taka ha'u ibun.

Sira hotu ne'ebé buka Ita Boot
hananu haksolok.

Sira hateten "Na'i, Ita boot tebes!"

Sira hotu ne'ebé hakaran Maksoin.

